

四庫全書

史部

欽定四庫全書

欽定南巡盛典卷三十

恩綸

乾隆四十八年正月十五日

上諭內閣曰兩江總督薩載浙閩總督富勒渾等合詞
呈奏以江浙兩省臣民望幸情殷且河工海塘以次
告竣一切善後事宜尤冀親臨指示懇請於乾隆四
十九年春六舉南巡盛典以愜輿情一摺朕自庚子

南巡時高家堰石塘及徐州城外石隄鉅工俱逐一
親臨指示茲據奏以次告成所有一切善後事宜自
應蒞閱視指授機宜俾河流永慶安瀾至浙省海塘
前經降旨將柴塘二千四百餘丈一體改建魚鱗石
塘為海濱羣黎永資捍衛今要工將竣亦不可不親
為相度且自四十一年告工

闕里後閱時已久應行展謁

孔林以仲景仰今據該督撫等合詞呈奏江浙兩省耆

庶望幸忱。尤為肫切。著照所請。於乾隆四十九年正月。詠吉。啓鑾。祇謁。

孔林巡幸江浙。順道親閱河工海塘。所有各處行宮座落。俱就舊有規模。畧加葺治。毋得踵事增華。致滋繁費。該督撫等。其善體朕意。妥協辦理。副朕省方問俗。觀民孚惠。至意。摺并發。

乾隆四十八年九月二十六日

上諭內閣曰。朕明歲南巡。一切行營供頓。俱預期頒發。

帑金交該督撫備辦從無絲毫擾累閭閻但恐各督
撫不能仰體朕意致滋糜費如現在盛京途次見有
搭蓋買賣街蓆棚即此一節亦屬多事隨從之官員
人等其日用所需聽其自便每歲木蘭行圍何嘗官
為預備並未缺少食物且添此蓆棚恐差竣後不肖
屬吏冒濫開銷在所不免朕明春巡幸自直隸以至
浙江著傳諭各該督撫不得隨營預備買賣街支搭
棚廠以滋無益之費至此令阿哥等隨行者原令

左右隨侍知朕年逾古稀未嘗少懈而扈蹕諸大臣亦皆恪恭敬事管束嚴明此令阿哥等觀看之意也該督撫等務須循照上數次之例辦理差務行所無事總以節儉為主不得因有阿哥隨行稍為添設預備再各省鹽政織造關差皆係內府世僕知公主隨行係朕所躔愛或進衣服食物以博朕歡殊不思服食玩好宮中何物蔑有豈藉外間呈進著一併傳諭飭禁伊等係內務府人員尚不許稍有進獻至督撫

為封疆大吏又何得效尤及此耶著將此傳諭知之

乾隆四十八年十一月初四日

上諭內閣曰朕于明年正月十一日啓鑾巡幸江浙閱
視河工海塘所有應行事宜各該衙門照例預備

乾隆四十八年十一月十三日

上諭內閣曰朕明春南巡著照從前之例於江浙二省
冬兌漕糧內各截留十萬石在水陸駐蹕地方分廠
平糶即令漕運總督及各該督撫妥協辦理該部遵

諭速行

乾隆四十八年十二月二十一日

上命軍機大臣傳諭兩江總督薩載湖北巡撫姚成烈等曰昨據舒常奏安南國賫進謝恩奏表使臣黃仲政等於十一月十八日由水路經過長沙省城等語因令軍機大臣查核歷次該國使臣行走程站日期約于明年閏三月內方可到京彼時距廻鑾之期尚遠該使臣等未免守候需時不若令其由湖北取道

江西安徽前赴江寧祇候於閏三月初旬駐蹕江寧
時令其在彼就近瞻仰該處為省城都會之地且行
宮宏厥賜宴亦屬妥便著傳諭姚成烈即遵照傳知
護送委員併咨沿途各督撫於該使臣到境時一體
委員交替接護并扣算程途先期數日令其抵江寧
亦不必太早如該使臣等於到江寧後仍愿赴京貿
易再加恩俯從其便將此諭令薩載等知之

乾隆四十九年正月初六日

上諭內閣曰朕今歲巡幸江浙原擇本月十一日啓鑾
但節候在立春以前天氣尚寒著諏吉於二十一日
啓鑾

同日

上命軍機大臣傳諭直隸總督劉戡等曰此次巡幸江
浙業經降旨諏吉於正月二十一日啓鑾彼時已過
燈節所有直隸山東備用烟火俱不必預備將此傳
諭劉戡明興知之

乾隆四十九年正月二十三日

上命軍機大臣傳諭兩江總督薩載湖北巡撫姚成烈等曰姚成烈奏安南國使臣於二月初旬可出楚省之蘄州境復自江西安徽等省從容前進務令於三月杪閏月初間行抵江寧等語朕此次駐蹕江寧計在閏三月初十日該使臣若於三月杪閏月初間到彼祇候途次未免匆迫祇須飭令伴送人員途次緩程行走於閏三月初五六間行抵江寧省城祇候瞻

覲更覺從容著傳諭姚成烈即遵照辦理並諭薩載知之

乾隆四十九年正月二十三日

上命軍機大臣傳諭衍聖公曰衍聖公孔憲培現在制中到曲阜時並其本家官員人等毋庸賜宴並著於中水地方送駕

乾隆四十九年二月二十三日

上諭內閣曰朕清蹕巡方順時行慶而矜恤庶獄屢念

尤深宜沛德音用敷愷澤所有江蘇安徽浙江三省
軍流以下人犯俱著加恩各予減等發落用昭肆育
施惠至意

乾隆四十九年閏三月十五日

上命軍機大臣傳諭直隸總督劉綎等曰現在隨駕之
蒙古王貝子等至揚州即令其先行各回本處前因
薩載與伊等係同在御前行走之人聽其致送紬緞
土儀俾盡同僚交誼至劉綎明興與伊等素無交往

不可因聞江南曾有贈送亦或踵而行之斷乎不必
况彼等已由揚州先回游牧尤非隨駕可比更不應
有餽送將此諭令知之

乾隆四十九年四月初七日

上諭內閣曰朕巡幸江浙慶典覃敷於庶獄尤深矜恤
業經降旨照歷次南巡之例將江浙二省軍流人犯
減等發落但念山東直隸二省現在缺雨農田望澤
維殷清理庶獄亦可感召天和所有該二省軍流以

下人犯亦著一體加恩各予減等發落用普仁施以
期甘霖速霈



欽定南巡盛典卷三十

欽定四庫全書

史部

欽定南巡盛典卷三十一之三十四

詳校官廣西道臣王天祿

欽定四庫全書

欽定南巡盛典卷三十一

蠲除

臣等謹按史冊所載蠲除之制一曰給復徭役一曰除其賦稅一曰所賑貸勿收非時而行行之而不必遍及至若省耕省斂補助必周畿甸豫遊盛推夏諺西漢制為近古然如登泰山幸中都所除逋賦賜田租者不過五縣三縣而止迨東漢車駕

所至復南頓田租復濟陽徭役則又加狹焉從未
有巡省屢舉新舊並蠲直以非常之典為疊沛之
膏者也我

皇上子惠元元有加無已屢經普免天下地丁正賦普
免天下漕糧而議賑議蠲每歲不下數百萬兩及
六飛時邁政在養民辛未則

特免江南歷年逋賦二百五十八萬五千餘兩浙江本
年正課三十萬兩丁丑壬午則蠲免逋賦外又與

直東二省並減所過州縣本年額徵十之三矣稍
歉者十之五矣省會且概除之矣乙酉則免江南
例不准蠲之折色一百四十萬兩有奇本色十一
萬石有奇浙江折色十三萬兩有奇本色一萬石
有奇庚子甲辰載迓

鑾輅復舉直隸山東江南浙江四省歷年積欠銀米驟
予豁免而省會之正賦全蠲

蹕路之經過減額並如往例下泊海濱竈戶吳下公田

莫上上廩

慈懷同沾愷澤民豐物阜益慶盈寧大有頻書餘糧棲
畝其在益之象曰損上益下民悅無疆天施地生
其益無方此

聖德之所以大光也乎謹錄

蠲除第三

乾隆十五年正月初二日

上諭內閣曰各省耗羨銀兩以備地方一切公用向因

漫無稽考是以條列章程該部歲杪察核朕思有正
供而後有耗羨耗羨非正供可比其未完之項雖應
一體催徵但輸將不無拮据朕巡幸所至地方應酌
量加恩以紓民力直隸屢經巡歷今春暨秋清蹕五
臺命駕河汴明歲即當南幸江浙山東亦所必經所
有耗羨內直隸山西河南浙江四省未完銀兩全行
豁免江蘇安徽山東三省未完銀兩蠲免十分之六
着該督撫確查實數毋令吏胥借端挪抵正耗混淆

暗行侵蝕倘有朦混滋弊即行叅奏從重治罪上司
稍有徇隱一併嚴議處務使閭閻均沾寔惠以普恩
膏

同日

上諭內閣曰朕巡幸江浙問俗省方廣沛恩膏聿昭慶
典更念東南貢賦甲於他省其厯年積欠錢糧雖屢
准地方大吏所請分別緩帶以紓民力而每年新舊
並徵小民終未免拮据朕宵旰勤勞如傷在抱茲當

翠華親蒞倍深軫切用普均沾之澤以慰望幸之忱
著將乾隆元年至乾隆十三年江蘇積欠地丁二百
二十八萬餘兩安徽積欠地丁三十萬五千餘兩悉
行蠲免俾官無罣悞民鮮追呼共享昇平之福夫任
土作貢歲有常經自應年清年款江蘇積欠乃至二
百二十餘萬之多催科不力有司實不能辭其咎而
疲玩成習豈明間風俗之澆漓尚有未能盡革歟朕以
初次南巡故特加恩格外嗣後該地方官務宜諄切

勸諭加意整頓其在小民亦當漸除舊習勉効輸將
勿謂曠典可希冀屢邀而惟正之供任其逋負也其
浙江一省雖額賦畧少於江蘓而節年以來並無積
欠豈犬牙相錯之地不齊乃至是歟此具見浙省官
民敬事急公之義而江蘇官民所宜懷慙而儆法者
也朕甚嘉焉著將本年應徵地丁錢糧蠲免三十萬
兩以示鼓勵各該督撫其仰體朕惠愛黎元之意嚴
飭所屬實力奉行使閭閻均沾實惠倘有不肖官吏

以完作欠希圖侵蝕察出即行糾叅從重治罪並將
此通行曉諭知之

乾隆十六年正月十五日

上諭內閣曰朕南巡江浙經過畿輔雖一應供頓俱令
動支公項而安營除道未免有需民力朕心深為軫念
著將直屬所過州縣本年應徵額賦蠲免十分之三
交該督方觀承確查妥辦務俾小民得沾實惠

乾隆十六年正月二十一日

上諭內閣曰朕南巡江浙道出青齊該省去臘以來雨雪霑足麥秋豐稔有望雖一切安營除道俱由官辦而當茲春融土潤正當有事西疇朕省方問俗念切閭閻著將經過山東州縣本年額賦蠲除十分之三交與巡撫準奏詳悉查明照例辦理務俾得霑實惠該部遵諭速行

乾隆十六年正月二十六日

上諭內閣曰朕清蹕南巡道由山左所有經過州縣既

已特沛恩膏茲攬轡觀風知連歲有秋視戊辰東巡
之時間閭大有起色為之慶慰尚念該省積年緩徵
帶徵未完穀石皆因災出借之項雖疊遇有秋而按
年催比民力不無拮据著將被災借穀應於庚午年
起分作五年帶徵及鄒平等屬帶徵未完穀共九十七
萬五千餘石概行豁免以昭格外優恤之至意

乾隆十六年二月初五日

上諭內閣曰朕車駕南巡乘時佈澤蠲除積欠疊沛恩

施更念江蘇之宿遷等州縣上年被水稍重雖經格外加賑可以接至麥秋該督撫等自督率地方官按期散給災黎均沾實惠而清蹕所經倍深軫念著再加恩將經過之宿遷清河桃源三縣被災貧民上年借出籽種銀兩悉行免其徵還以紓民力該部遵諭速行

同日

上諭內閣曰朕愛養黎元惟恐一夫不獲時巡所至疊

沛恩膏前已降旨將江省民賦積欠悉行豁免更念
兩淮竈戶僻處海隅專以煎曬鹽勛為業其生計更
窘於農民殊深軫念所有乾隆二年至十四年因災
停緩帶徵各未完折價共銀四萬二千餘兩著加恩
照民戶例一體豁免俾斥滷編氓咸霑惠澤該部遵
諭速行

乾隆十六年二月二十四日

上諭內閣曰江南揚州府屬之興化縣積淹荒廢田畝

錢糧久經停緩後歸冬勘辦理於乾隆九年起按年
勘報豁糧其元年至八年原緩未完銀米麥石仍應
分別催輸荒戶殊屬拮据朕翠華南巡廣敷恩澤著
將此項原緩未完銀米麥石一並查明加恩豁免以
甦民困該部遵諭速行

同日

上又諭內閣曰朕聞常州府屬之武進陽湖二縣開抵
役田租銀一項原係前明時虛田領價後因本戶逃

亡株連親族各將已產開抵實非前明原置之田亦
非當日領價之戶小民條糧役租力難並輸以致積年
拖欠朕省方所至民隱勤求清問既周倍深軫念著
將武進陽湖二縣開抵後田除應辦條漕仍照民田
一例完納外其新舊租銀概予豁免以除民累凡爾
百姓尚其永承樂利各相勉於孝弟力田以副格外
加恩之至意焉

乾隆十六年四月初六日

上諭內閣曰徐州府屬沛縣濱江地畝近年以來屢被
水災所有應徵租銀自乾隆十年起按年勘報蠲豁
而九年以前積欠未完租銀以不在勘報之例仍須
照數輸納貧民未免拮据著將乾隆九年以前應徵
未完租銀三千一百餘兩一併加恩豁免以示軫恤
災黎之至意該部即遵諭行

乾隆二十二年正月初二日

上諭內閣曰今春朕恭奉

皇太后鑾輿載臨江浙間俗省方行慶施惠而東南黎庶
望幸情殷茲當翠華發軔之初宜沛渥恩用照盛典
乾隆十六年肇舉南巡曾頒恩諭將江蘇安徽十三
年以前積欠地丁悉行蠲免浙省因無積欠特免應
徵地丁三十萬兩以示鼓勵亦欲思愷澤覃敷官無
望悞民免追呼共享昇平之福乃邇年來江浙間被
偏災其積欠未完之數又復不少雖維正之供歲有
常經不宜任其逋欠然天時之不齊亦非盡小民之

過也該二省去歲秋成豐稔糧價平減據地方大吏
陳奏並清問所及民物康阜井里恬熙朕心實為忻
慰但閭閻蓋歲時厯宵旰若今新舊並輸於民力未
免拮据著將江蘇安徽浙江乾隆二十一年以前積
欠未完地丁銀兩概予蠲免該督撫等其嚴飭所屬
實力奉行毋令胥吏侵蝕中飽務俾恩膏普逮實惠
均沾稱朕懷保黎元至意該部即遵諭行

乾隆二十二年正月十五日

上諭內閣曰直隸天津府屬各州縣應徵錢糧遞年緩帶積欠稍多近因年歲豐稔百姓爭先完納現在尚有滄州未完地糧八千餘兩靜海滄州南皮未完米穀豆二千餘石麥折銀三十餘兩又靜海滄州未完入官地租銀一千五百餘兩皆係貧乏小戶零星積欠若仍新舊並輸於閭閻生計未免拮据著加恩概予豁免該督方觀承其轉飭各該州縣務宜實力奉行毋令吏胥侵蝕中飽

同日

上諭內閣曰朕此次南巡所有經過直隸山東地方本年應徵地丁錢糧俱著加恩蠲免十分之三此內山東上年偶被偏災處所著免十分之五該督撫等董率屬員查明妥協辦理務俾小民均沾實惠該部即遵諭行

乾隆二十二年二月初一日

上諭內閣曰朕稽古省方載臨江浙將以勤求民隱廣

沛恩膏是以啟鑿之光卽經降旨將該二省乾隆二十一年以前積欠悉行蠲免而時當春令東作方興水陸經行一切除道挽舟雖皆按丁給值然終未免有需民力入疆伊始軫念方殷所有江南浙江經過各州縣地方本年應徵地丁銀兩俱著加恩蠲免十分之三此內或有去秋被水歉收者蠲免十分之五該督撫等其飭屬查明實力奉行稱朕加惠黎元至意

乾隆二十二年二月初五日

上諭內閣曰朕清蹕時巡勤求民隱兩淮竈戶僻處海濱生計勞苦尤堪軫恤所有乾隆十七十八十九等年停緩帶徵竈欠未完折價銀三萬八千餘兩着加恩一體豁免以普惠澤

同日

上又諭內閣曰從前恩詔內令將各省年久民欠錢糧查明豁免而積欠漕項該部未經查奏今朕巡幸所至

清問閭閻其在江北一帶則俱由積歛停緩江南各屬又悲皆積年尾欠升合疇零若仍按年帶徵于貧黎生計愈滋拮据其將江南省乾隆十年以前積欠漕項銀米及以地漕耗羨俱著加恩一體豁免以慰軫恤民瘼至意

乾隆二十二年三月初一日

上諭內閣曰江浙二省積欠地方銀兩前已有旨豁免而浙省所免獨少足見黎庶素屬急公今巡省莅止

金匱要略卷之二十一
卷三十一
因命悉查各項則尚有乾隆十八十九二十等年各
屬未完緩徵及蠲剩漕項銀十八萬九千餘兩二十
年分杭嘉湖紹四府屬縣場未完借欠籽本銀三萬
七千八百餘兩十八二十年分各衛所未完屯餉銀
六千四百餘兩並海寧縣未完沙地公租銀二千餘
兩着加恩概行豁免該督撫等其董率屬員實力奉行
毋令胥役里長侵蝕中飽副朕曲體愷解之至意

乾隆二十二年三月十八日

上諭內閣曰朕稽查省方乘時布澤翠華所至賜賚蠲租而省會駐蹕之地加恩宜渥其將江南之江寧蘇州浙江之杭州附郭諸縣本年應徵地丁銀兩悉予豁免用昭行慶施惠之盛典該部即遵諭行

乾隆二十二年四月初四日

上諭內閣曰江南淮徐海等屬受水患有年久朕翠華南蒞周覽土風所過桃源宿遷邳州睢寧諸州縣鵝衣鵠面相望于道而徐屬較甚朕心為之怒然增戚

國家所恃以拯患卹災者惟賑濟一事現在徐屬七
州縣已降旨加展賑期可至五月並截留本處錢糧
以資借糴所以為斯民計者不遺餘力而目擊情形
于心寔有所不忍所見如此未見者亦復可知若加
恩將淮徐海三屬各州縣所有積年借欠籽種口糧
不分新舊槩予豁免以紓痼瘵一體之念惟是恩澤
所施非得賢守令寔力奉行無由下究况在積歛之
區尤資良牧必得慈祥公正寔心任事之人以父母斯

民為己責竭力區畫經營拊循培養庶幾日有起色若
任其因循闕茸漠不關情假手昏吏視為故事年復一
年積疲重困即使厚費帑金蒼生何能免溝壑流離
之慘是以此方州縣視他處更重該督撫當慎加遴
選務得有猷有為惻悌愛民者以膺斯任仍時時留心
體察有暇即親行各詢使窮鄉僻壤民隱畢達守令賢
否自不能掩惟期于地方有益該督撫其善體朕懷
毋僅以簿書期會為課吏之先務也其數府現任守令

各官著該督撫各出考語具摺奏聞或有如所諭賢明
之吏宜留任者或有不能勝此而可以調他處事簡者
其悉心詳酌一二年後朕將親臨考察若仍入其彊而田
野不治則非守令之罪將該督是問矣若將此通行曉諭
知之

乾隆二十二年四月十七日

上諭內閣曰山東濟寧等州縣上年被水村莊已屢次
加恩賑卹並特命大臣開濬荊州山橋河道以資宣洩

今省方所至清問彌切各該州縣春季涸出地畝僅及
其半尚可乘時補種而現未消涸者尚多卽甫經涸
出之處尚溷渾難以犁種朕心深為軫念著將濟寧魚
臺金鄉滕嶧五州縣積年民欠地丁錢糧七萬五千
餘兩常平倉三十萬九千餘石借欠籽種麥本四千九
百餘兩加恩槩予豁免該撫等其董率屬員妥協經
理務令實惠均霑毋飽胥吏侵蝕以副朕加卹窮黎之意

乾隆二十二年九月二十五日

上諭內閣曰山東濟寧魚臺金鄉滕縣嶧縣等五州縣連歲
被災其積年民欠地丁錢糧常平倉穀俱已加恩豁免而
隨正徵收之耗羨銀兩係備地方公用而向例不在恩蠲之
內在被災貧黎生計為艱既恐不能照數完納且正項既已
蠲除復徵此畸零之耗羨不肖書吏藉端滋事閭閻仍不免
追呼之擾著加恩將濟寧等州縣積年未完耗羨銀一
萬一百兩一併豁免以示體卹災民之至意該部即遵諭行

欽定南巡盛典卷三十一

欽定四庫全書

欽定南巡盛典卷三十二

蠲除

乾隆二十七年正月初二日

上諭內閣曰今春朕恭奉

皇太后鑾輿巡幸江浙便道閱視河工海塘與封疆大臣
講求吏治民生諸要務念昨冬恭逢

慈恩覃被之餘正東南士民望幸情殷之候翠華所過宜

沛隆施益光

慶典著將江蘇安徽浙江三省自乾隆二十二年起至二十六年止所有節年災田緩徵及未完地丁各欠項照二十二年例概予蠲免該督撫等其嚴飭所屬悉心核實奉行俾閭閻膏澤均沾毋致吏胥中飽副朕錫類推恩至意該部遵諭速行

乾隆二十七年正月十三日

上諭內閣曰朕此次南巡所有經過直隸山東地方本年

應徵地丁錢糧俱著加恩蠲免十分之三此內該二
省上年偶被偏災處所著蠲免十分之五該督撫等
董率屬員查明妥協辦理俾小民均沾實惠該部導
諭速行

乾隆二十七年正月二十四日

上諭內閣曰東省去秋被水偏災各屬已疊降恩旨多
方撫恤茲朕鑾輿臨幸體察民依雖閭閻氣象和樂
而災黎元氣始復深為厯懷該省尚有歷年未完民

欠商輸等穀及籽糧麥本牛具等銀例應照數徵收
還項著再加恩將惠民商河霑化金鄉魚臺濟寧州
濟寧衛荷澤單縣城武定陶范縣館陶臨清衛等十
五州縣衛自乾隆十年至二十四年民欠常平商輸
等穀三萬七千餘石又金鄉魚臺濟寧等三州縣二
十二三四等年民欠籽糧麥本牛具等銀一萬四千
九百餘兩概予豁免俾民力益加寬裕足資耕作副
朕嘉惠災黎至意該部遵諭速行

乾隆二十七年二月初四日

上諭內閣曰朕恭奉

皇太后鑾輿巡省江浙前已特頒恩旨將該二省積欠地
丁全行豁免茲入疆伊始慶典宜行所有江南浙江
水陸經過地方本年應徵額賦俱著加恩蠲免十分
之三此內或有去秋被水歉收者蠲免十分之五該
督撫等其董率屬員實力奉行稱朕子惠黎元至意
該部遵諭速行

乾隆二十七年正月十四日

上諭內閣曰朕此次南巡省方問俗翠華所過慶典時
行念兩淮竈戶僻處海濱生計殊為艱苦所有從前
帶徵未完折價銀九千餘兩著加恩一體豁免以示
優恤

乾隆二十七年三月二十七日

上諭內閣曰朕恭奉

皇太后安輿臨幸江浙翠華所至蠲賚疊加而省會駐蹕

之地宜行茂典載沛渥恩其江南之江寧蘇州浙江
之杭州附郭諸縣本年應徵地丁銀兩悉予豁免用
昭行慶施惠省方勤民之至意該部遵諭速行

乾隆二十七年四月二十八日

上諭內閣曰朕巡省江浙畿輔所過地方應徵額賦已
特頒恩旨分別蠲免但念各屬尚有節年民欠未完
之項因災分年緩帶錢糧尚應按數徵收茲回鑿沿
途體察民依宜敷惠澤著再加恩將乾隆十二年至

二十五年大興靜海龍門宣化懷安萬全西寧懷來蔚州四旂等十州縣廳未完地糧銀七千一百餘兩改折銀六千六百餘兩屯糧一萬六千餘石概予豁免其自十九年至二十五年各屬因災緩帶地糧銀八萬六千七百餘兩改折銀九千一百餘兩屯糧六萬三千餘石並著加恩於本年起限再分作三年帶徵俾民力益舒得資耕耨用稱愛養黎元至意該部遵諭速行

乾隆三十年正月初二日

上諭內閣曰今春朕恭奉

皇太后安輿四巡江浙東南黎庶望幸情殷宜布渥恩用
光盛典前此三經臨幸恩旨疊頒所有江南省積欠
地丁等銀蠲免至二百餘萬兩維時地方大吏率多
遵循舊例例所應蠲者不論災熟積欠並予豁免而
於因災緩帶之項其中有例不准蠲者轉未獲一體
邀恩於情理未為允協因思成熟地畝當年出產本

豈自不難踴躍輸將年清年款其陳積未完者實不
免預覲恩膏有心觀望若因災停緩之糧勢由歲歉
不齊致滋逋負初非玩戶抗延之比今翠華所過慶
典聿修而此等稜薄窮黎未蒙濺澤朕心實為軫念
著加恩將江蘇安徽乾隆二十五年以前節年因災
未完蠲剩河驛俸工等款並二十六七八三年因災
未完地丁河驛等款以及二十八年以前節年因災
未完漕項暨因災出借籽糧民糧民借備築堤堰等

銀一百四十三萬餘兩又籽種口糧內米麥豆穀十
一萬三千餘石概予蠲免至浙江一省額賦本較江
南為少其積欠亦屬無多著將乾隆二十六七八三
年因災未完地丁銀兩並二十七年屯餉沙地公租
二十六七兩年未完漕項等銀一十三萬二千五百
餘兩又二十八年借給籽本穀一萬三千七百餘石
加恩悉行蠲免以均惠澤該督撫等其董率所屬實
力詳查妥辦副朕嘉予元元至意倘有不肖胥吏從

中舞弊影射侵漁察出即與嚴叅從重治罪該部遵諭速行

乾隆三十年正月十七日

上諭內閣曰朕此次巡幸江浙所有經過直隸山東地方本年應徵地丁錢糧俱著加恩蠲免十分之三該督撫等務董率屬員實力奉行俾小民均沾實惠副朕愛養黎元之至意

乾隆三十年正月十八日

上諭內閣曰直隸連歲收成豐稔民間蓋藏自應充裕
但從前因災未完積欠新舊並徵尚恐難於完納茲
當鑾輅南巡道經畿輔體察民隱用沛恩膏以廣慶
澤著加恩將直隸各屬自乾隆十九年至二十五年
舊欠並二十六年未完緩徵銀共三萬二千四百年
兩米穀豆共三百五十餘石一體豁免該督其實力
稽察妥協辦理俾閭閻並霑實惠稱朕疊沛渥恩至
意該部即遵諭行

乾隆三十年正月二十四日

上諭內閣曰朕清蹕時巡道經山左昨已特沛恩膏降旨將所過地方本年額賦蠲免十分之三東省連歲豐稔民氣恬熙朕攬轡所覩深為欣慰但念該省尚有積年欠項皆係從前無力輸將所致若按限催科仍恐稍有拮据著加恩將濟南武定兗州曹州東昌等府屬乾隆二十六七兩年未完因災緩徵地丁暨民借麥本牛具等銀六萬二千九百五十餘兩又濟

南武定兗州東昌曹州沂州等府屬乾隆十二年至
二十七等年未完因災緩徵暨民借年久常平倉穀
七萬五千四百四十餘石概行豁免俾閭閻益資饒
裕該撫其善體朕意率屬實力奉行務期膏澤下施
均沾實惠該部即遵諭行

乾隆三十年二月初七日

上諭內閣曰朕恭奉

皇太后安輿四巡江浙啟鑾之前已特頒恩旨將該二省

積年緩帶未完銀糧全行豁免茲當入彊伊始宜敷愷澤以昭盛典所有江南浙江水陸經過地方本年額賦俱著加恩蠲免十分之五該督撫等其率屬實力妥辦稱朕觀民行慶至意該部遵諭即行

乾隆三十年二月初九日

上諭內閣曰宿遷一帶地方濱河沮洳土瘠民貧從前巡幸所經每深軫念茲入彊咨省見閭閻氣象較前頗覺寬舒攬轡之餘用深欣慰昨已降旨免經過州

縣額賦十分之三因念陸路經行一切灑道清塵較
水程倍為勞動雖按名給值絲毫不以累民而百姓
踴躍赴公瞻依恐後其情尤堪嘉悅著加恩將現在
經過之宿遷桃源清河暨回鑾時所過之銅山等四
縣本年應徵地丁銀兩蠲免十分之五該督撫其率
屬實心經理俾益藏益資饒裕元氣大復共樂恬熙
以副朕加惠愛養之至意該部遵諭速行

乾隆三十年二月十六日

上諭內閣曰朕此次南巡啟鑾前已降旨將江蘇省歷年災緩節欠一百四十餘萬兩概行豁免並於入疆之初諭將經過地方本年額賦蠲免十分之三宿遷等縣地土素稱瘠薄特免十分之五以示體恤今自渡淮而南見羣黎歡迎道左愛戴有加因念江蘇為財賦重地頻歲屢獲豐稔維正之供諒無拮据但所免災欠一項蘇松各屬不及淮徐之多恩施未能徧逮即駐蹕處所將來更沛恩膏亦止省會數縣其餘

各屬尚未一體均沾著再加恩將江蘇布政使所屬各州縣乾隆二十八年以前熟田地丁雜款未完銀四萬一千六百餘兩一體概行豁免並將江蘇經過地方本年錢糧均免十分之五俾閭閻益資殷阜共樂昇平副朕加惠無已至意該部遵諭速行

乾隆三十年閏二月初三日

上諭內閣曰朕巡幸江浙啓鑿之初降旨將江浙二省累年積欠銀糧全數豁免而浙省所免之數較之江

省尚少茲當入疆伊始疇咨民瘼該省尚有未完款項著再加恩將浙江省乾隆二十六七八等年積欠未完漕項及仁和袁浦等場未完竈課銀一萬八千六百餘兩二十四六七八等年因災緩帶積欠未完南米及借給各場竈戶倉米一萬八千九百餘石二十六八兩年錢塘諸暨玉環等廳縣借給農民緩徵穀及因災緩徵租穀一萬六千九百餘石概行蠲免該督撫等其率屬實力奉行務俾恩膏下逮稱朕惠

愛黎元至意該部遵諭速行

乾隆三十年閏二月初四日

上諭內閣曰朕翠華南幸始莅浙境念該省所免積欠較江省獨少且於未奉恩旨以前復有續完之項民情可謂急公因命悉查積年未完各項無論於例應蠲與否盡予豁免以紓民力至清蹕所經前已降旨蠲本年十分之三昨巡歷江省復念淮徐各屬地瘠民貧江淮以南人知愛戴凡水陸經行州縣加免十

分之五浙省雖郵頓無多而除道清塵亦足覘閭
歡感兩省皆係赤子誠求懷保厥視維均著再加恩
將浙江經過地方本年應徵錢糧概免十分之五俾
羣黎普沾膏澤益慶阜恬副朕入疆施惠至意該部
即遵諭行

同日

上又諭內閣曰朕稽古省方四莅江浙已降旨將經過
地方本年額賦豁免十分之三兩省會駐蹕之地加

恩更宜優渥其將江南之江寧蘇州浙江之杭州附
郭諸縣本年應徵地丁銀兩概予豁免用宣慶惠該
部遵諭速行

欽定南巡盛典卷三十二

欽定四庫全書

欽定南巡盛典卷三十三

蠲除

乾隆四十五年正月十二日

上諭內閣曰朕巡幸江浙省方觀民鑿輅所經宜施渥澤用普春祺所有經過直隸山東地方本年應徵地丁錢糧俱著加恩蠲免十分之三該部即遵諭行

乾隆四十五年正月十三日

上諭內閣曰朕清蹕時巡道經畿輔昨已特沛恩膏將所過地方本年額賦蠲免十分之三直省昨歲豐稔民氣恬熙朕心深為欣慰第念該省尚有節年欠項皆因從前被災較重時出借今若按律催科民力恐不無拮据著再加恩將順德廣平大名天津四府屬所有積年因災出借常平倉穀八萬四千八百餘石折色銀九萬八千七百餘兩屯糧豆穀一千二百四十三石零概予蠲免該督其實力稽察妥協辦理俾

閭閻均沾實惠該部即遵諭行

乾隆四十五年正月二十日

上諭內閣曰朕清蹕時巡道經山左昨已特沛恩膏降
旨將所過地方本年額賦蠲免十分之三茲當入疆
伊始疇咨民瘼該省尚有未完款項着再加恩將山
東省乾隆四十二三四等年歷城等二十一州縣因
災緩徵未完地丁銀十三萬四千四百餘兩臨清等
七州縣因災緩徵未完常平穀二萬六千三百餘石

社穀二千四百餘石麥種合穀三千二百餘石概予
豁免該撫其善體朕意率屬實力奉行俾閭閻均霑
實惠副朕惠愛黎元用普春祺至意該部即遵諭行

乾隆四十五年二月初五日

上諭內閣曰朕因東南黎庶望幸情殷爰舉舊章五巡
江浙茲當入疆伊始慶澤宜敷所有江南浙江水陸
經過地方本年應征地丁錢糧俱着加恩蠲免十分
之三該部即遵諭行

同日

上又諭內閣曰朕翠華南幸慶典時行蹕路所經已降
旨將直隸山東二省累年積欠銀糧概予蠲除江省
為財賦重地茲入疆伊始渥澤宜覃著加恩將江寧
藩司所屬自乾隆十一年至四十四年積欠及災緩
共未完銀四十五萬二千餘兩未完米十七萬二千
餘石蘇州藩司所屬自乾隆三十九年至四十三年
災緩未完地丁屯折漕項學租銀二萬三千九十六

兩未完災緩漕糧漕項兵糧米十二萬九千八百九十餘石又安徽藩司所屬自乾隆四十三年以前積欠災緩地丁漕項等款共未完銀四十萬七百餘兩未完米麥穀九萬七千六百餘石俱全行豁免用敷愷澤副朕行慶施惠之至意該部即遵諭行

乾隆四十五年二月初八日

上諭內閣曰朕此次南巡勤求民隱翠華所過慶典時行而兩淮竈戶僻處海濱生計殊屬艱苦所有乾隆

三十九四十四十二四十三等年各場因災帶徵遞
緩各未完銀三萬五千六百二十四兩零著加恩普
行豁免以示惠澤

乾隆四十五年二月初九日

上諭內閣曰朕巡行江浙取道維揚因念兩淮竈戶生
計勞苦業經降旨將節年未完應徵積欠銀三萬五
千餘兩全行豁免以示惠恤其兩淮商衆踴躍抒忱
並應一體加恩俾霑慶澤所有應還川餉項內尚有

未繳銀一百二十萬兩著加恩全行豁免又兩淮商人歷綱提引餘利項內庚子年限應完銀二十七萬六千餘兩並著展限遞緩一年俾淮揚商衆益資饒裕該部即遵諭行

乾隆四十五年二月十五日

上諭內閣曰朕巡幸江浙已經降旨將經過地方本年額賦蠲免十分之三而省會駐蹕之地加恩更宜優渥着將江南之江寧蘇州浙江之杭州所有附郭諸

縣本年應徵地丁錢糧概予豁免俾近光黎庶無事
輸將共享盈寧之福該部即遵諭行

乾隆四十五年二月三十日

上諭內閣曰朕展義言巡順時行慶浙省輦路所經本
年應徵地丁錢糧已先降旨蠲免十分之三茲當入
疆伊始用宜更沛新恩俾資樂利所有該省歸安等
縣緩征未完地丁漕白各款銀五萬三千九百餘兩
零並歸安等三縣緩征未完南米四千七百餘石仁

和等三縣未完民借穀一萬八千二百餘石均著加恩一併豁免以紓民力該督撫等其董率各屬實力奉行稱朕愛惠黎元至意該部遵諭速行

乾隆四十九年正月二十一日

上諭內閣曰朕巡幸江浙省方觀民鑾輅所經宜施渥澤用溥春祺所有經過直隸山東地方本年應徵地丁錢糧俱著加恩蠲免十分之三該部即遵諭行

乾隆四十九年正月二十二日

上諭內閣曰朕清蹕時巡道經畿輔昨已特沛恩膏將所過地方本年額賦蠲免十分之三第念該省尚有積年欠項皆因從前偶被偏災較重地方隨時出借今若按限催科民力恐不無拮据著再加恩將順天保定河間天津正定順德廣平大名宣化遵化趙州深州等十二府州屬未完積年因災出借倉穀一十五萬五千二百四十石概予豁免該督其實力稽查妥協辦理俾閭閻均霑實惠該部即遵諭行

乾隆四十九年正月三十日

上諭內閣曰朕清蹕時巡道經山左昨已特沛恩膏將所過地方本年額賦蠲免十分之三茲當入疆伊始疇咨民瘼該省尚有未完款項著再加恩將山東省利津霑化等二十一州縣衛因災出借籽種牛具銀十一萬八千六百一十九兩零並因災出借倉穀十萬一千一百餘石概予豁免該撫務須率屬實力奉行俾閭閻均沾實惠副朕行慶施惠有加無已之至

意該部即遵諭行

乾隆四十九年二月十六日

上諭內閣曰朕因東南士庶籲幸情殷且河工海塘以次告竣一切善後機宜均須親臨指示爰循舊典六巡江浙茲當入疆伊始慶澤宜覃所有江南浙江水陸經過地方本年應徵地丁錢糧俱著加恩蠲免十分之三該部即遵諭行

同日

上又諭內閣曰朕翠華南幸慶典時行蹕路所經已降
旨將直隸山東二省因災積欠銀米概予蠲除江省
為財賦重地茲入疆伊始渥澤宜覃著加恩將江寧
藩司所屬積欠地丁漕項等款未完銀三十六萬七
千五百十兩零民借籽種口糧未完銀一十五萬一
千九百五十九兩零漕糧漕項等款未完米麥豆一
十八萬九千七百二十六石零蘇州藩司所屬地丁
漕項等款未完銀四萬五百五十四兩零民借籽種

口糧未完銀一千二百四十八兩零漕糧漕項等款
未完米豆三萬八千九百六十四石零安徽藩司所
屬地丁等項未完銀三十七萬三千二百一十一兩零
民借籽種口糧未完銀六萬一千九百兩零漕倉等
項未完銀八萬三千一百六十三兩零漕糧漕項等
款未完米麥豆六萬五千七百四十餘石零俱著全
行豁免用敷愷澤副朕行慶施惠之至意該部即遵

諭行

乾隆四十九年二月十七日

上諭內閣曰朕翠華南幸周咨民隱渥澤覃敷蘇州藩
司所屬地丁漕項公田餘租等款積欠銀糧業經概
予蠲除因思吳縣公田已與民田一例交納條銀漕
米並加徵義租嗣因該縣有積年無着田糧復於公
田徵收餘租米二千二百二十餘石抵補無著虛糧
七百餘石外尚餘米一千四百餘石留為該縣地方
公用歷年均有拖欠民力未免拮据自應特沛恩施

俾閭閻永資樂利所有該縣無著田糧除照舊於此
項餘租徵收抵補其留備地方公用應徵米一千四
百餘石著加恩永免徵收以示省斂惠民有加無已
之至意該部即遵諭行

乾隆四十九年二月二十六日

上諭內閣曰朕巡幸江浙已降旨將經過地方本年額
賦蠲免十分之三而省會駐蹕之地恩膏更宜優渥
著將江南之江寧蘇州浙江之杭州所有附郭諸縣

本年應徵地丁錢糧概予豁免俾近光黎庶無事輸將益享盈寧之福該部即遵諭行

同日

上又諭內閣曰朕翠華南幸取道維揚兩淮商衆踴躍抒忱自應特沛恩膏俾霑慶澤所有該商等未完提引餘利銀一百六十三萬二千七百七十四兩零著加恩全行豁免俾淮揚商衆益資饒裕該部即遵諭行

乾隆四十九年二月二十八日

上諭內閣曰朕此次南巡勤求民隱翠華所莅慶典時
行因念兩淮竈戶僻處海濱亦應一體加恩俾得均
沾渥澤所有乾隆四十五四十六等年各場因災帶
徵遞緩未完銀七千九百餘兩著加恩全行豁免以
光惠澤

乾隆四十九年三月十二日

上諭內閣曰朕翠華莅浙愷澤覃敷前已降旨將經過

地方本年額賦蠲免十分之三竝省城駐蹕之仁和
錢塘二縣本年應徵地丁錢糧概予豁免今入疆伊
始周諮民隱再沛恩綸所有杭州嘉興湖州三府屬
本年應徵地丁錢糧共一百九萬餘兩著再加恩普
免十分之三俾近光黎庶益享盈寧以副朕省方問
俗施惠閭閻有加無已之至意

乾隆四十九年閏三月初四日

上諭內閣曰朕鑿輅時巡普施慶惠前長蘆山東商衆

踴躍抒忱自應一體加恩俾沾渥澤所有長蘆應徵引課銀四十九萬餘兩山東應徵兩年引課銀三十六萬餘兩俱著加恩分作八年帶徵俾商力益資饒裕該部即遵諭行

欽定南巡盛典卷三十三

欽定四庫全書

欽定南巡盛典卷三十四

蠲除

乾隆二十二年六月二十六日江蘇布政使託恩
多奏言竊查本年恭逢

鑾輅南巡

恩綸疊沛蠲費頗仍已屬淪肌浹髓復於

聖駕經過之句容等十四州縣並去秋歉收之清河等

六州縣以及

駐蹕之江寧五縣將本年地丁錢糧分別蠲免三分五分以及全行豁免仰見

嘉惠子來更屬有加無已之

殊恩也臣伏思

皇上軫念民依政先貧乏且

經臨之處絲粟不以擾民在田多大戶非名列縉紳即席豐履厚衣租食稅垂及百餘年即今乾隆二十

一年以前之地丁十年以前之漕項凡有積欠悉
邀

恩免已不下二百餘萬田多則積欠自多一經邀免其
所以仰沐

天恩者較之小戶不啻什伯其倍今欽奉

俞旨恩蠲三分五分並全免之地丁猶得與貧乏小戶
共霑

惠澤更且獨受其豐揆之縉紳富戶恐亦自慚非分也

臣愚昧之見竊謂與其並蠲於大戶莫若先儘小戶錢糧全行蠲免省一歲之追呼裕四時之耕作億萬貧黎更為頂戴

深仁於罔極合無仰懇

皇上天恩俯准仿照乾隆四年前督臣那蘇圖

奏准全蠲五錢以下小戶之例稍為變通將應蠲三分之州縣將三錢以下之小戶全行蠲免應蠲五分之州縣將四錢以下之小戶全行蠲免其蠲剩

之數再以三錢四錢以上至三兩四兩以下之中
戶分別扣蠲至全免五縣之地丁其中尚有例不
並蠲之耗羨等銀並請

聖恩攤入五兩以上之大戶按田徵收五兩以下之小
戶竟行全免究之大戶邀免之賦尚倍多於小戶
總在

皇恩雨露涵濡之中並無偏倚不均之處如蒙

恩允仰懇

勅下督撫二臣督同臣乘此停徵之時分飭州縣核定
扣蠲定數造冊申送臣躬親核實轉呈督撫奏

聞咨部一面飭令州縣刊明易知由單給發各糧戶以
便啟徵輸納仍不許假手書胥以滋花分勒索諸
弊似此辦理臣非不知經徵州縣多此稽查扣報
之繁但事苟有益於民生豈敢任其避難就易仰
負

皇上念切民依無微不至意用敢敬獻芻蕘奏入

上諭曰託恩多奏南巡經過駐蹕及去秋歛收各州縣
恩蠲本年地丁錢糧先儘小戶分別蠲免一摺所奏
甚是江省乾隆二十一年以前之地丁十年以前之
漕項積欠頗多前經降旨概予豁免此等積欠多屬
大戶業已邀恩格外現在恩蠲本年地丁大戶少佔一
分則小戶多受一分之益自應照議查辦愛必達已
補授雲貴總督陳宏謀尚未到任著將原摺抄寄尹
繼善令其細心核實辦理

乾隆四十五年七月十八日江蘇巡撫吳壇奏言
切照今春恭逢

翠華南巡

皇上特沛

恩綸將江蘇省歷年積欠災緩各項銀米概予蠲免小
民感沐

鴻慈靡不淪肌浹髓臣等現在飭令江蘇兩藩司將所
屬未完應蠲銀米於去冬奏報截數之後至今春

欽奉

恩旨之時人有續完若干應免數內扣除核實造冊另行遵

旨題豁外茲查有吳縣公田餘租積欠一項緣該縣向有公田一萬二千五百餘畝原係明嘉靖年間本地富民捐置其承種民戶除完納地漕等項銀米之外歲收租息以為添補漕運之費自入我

朝以來此項公田應完租息民間久未完納迨乾隆

三十一年八月經前撫臣明德據吳縣知縣介玉

濤查出碑據

奏明將此項公田每年應徵餘租米二千二百二十七石通年抵補吳縣逃七無著錢糧之外歲餘米一千數百石留為該縣地方公用等因歷年遵照存留即作該縣歲修河渠等項公用足敷動支歲有餘剩隨時報部在案祇因此項餘租有類民間租息並非正賦亦不入正項報銷偶遇歛收之年

悉照應徵原額定數催徵並不按照灾分辦理以致歲有逋欠而向來每遇

恩旨亦從未援請蠲豁計自乾隆三十二年起到四十三年止共積欠餘租折色銀一萬九百八十九兩五錢七分七釐逐款清釐均係實欠在民並無官侵後蝕情弊伏思江省正項錢糧一切灾緩積欠俱已仰沐

殊恩普行豁免而此項餘租舊逋因係租款轉未能與

正賦一體邀

恩蠲除恐將來欠項日多益增民累且與現在恭辦
恩旨之案亦未畫一臣等愚昧之見可否仰懇

皇上天恩將此項公田餘租積欠附入本年

恩蠲案內一體蠲免俾民欠租息與民欠正賦同沐

膏澤庶不致稍有向隅並請嗣後如遇歉收之年亦照

別項民田之例一體勘明災分將應完租息隨同

該縣正賦一律蠲緩以昭

聖慈公普同仁之至意奏入

上諭曰著照所請行該部知道



欽定南巡盛典卷三十四